

## KERATAN AKHBAR

---

TARIKH : 25 JANUARI 2022  
AKHBAR : BERITA HARIAN  
MUKA SURAT : <https://www.bharian.com.my/berita/nasional/2022/01/915359/warga-jpm-diingatkan-kerja-dengan-jujur-berintegriti>

### Warga JPM diingatkan kerja dengan jujur, berintegriti



KUALA LUMPUR: Datuk Seri Ismail Sabri Yaakob mengingatkan warga kerja Jabatan Perdana Menteri (JPM) supaya bekerja dengan jujur dan berintegriti berikutan hampir semua dasar negara tertumpu pada jabatan berkenaan.

Perdana Menteri berkata, JPM perlu menunjukkan contoh yang baik kepada kementerian lain dan rakyat mengenai pelaksanaan dasar kerajaan.

Katanya, kebanyakan dasar kerajaan yang diumumkan berada di bawah punca kuasa JPM termasuk berkaitan dengan ekonomi seperti Rancangan Malaysia Ke-12 (RMKe-12) dan Belanjawan 2022, agama dan isu berkaitan Sabah Sarawak.

"Seluruh mata rakyat tertumpu hampir keseluruhannya kepada JPM kerana perkara berkaitan dengan negara dan rakyat terutama isu dasar, adalah di bawah JPM.

"Saya harapkan sokongan dan kerja keras semua pihak di JPM... dari pegawai, pemimpin dan kakitangan keseluruhannya," katanya.

Perdana Menteri berkata demikian ketika menyampaikan amanat kepada warga JPM, di Putrajaya, hari ini.

Yang turut hadir Menteri di Jabatan Perdana Menteri (Hal Ehwal Sabah dan Sarawak), Datuk Seri Dr Maximus Ongkili; Menteri di Jabatan Perdana Menteri (Ekonomi), Datuk Seri Mustapa Mohamed; Menteri di Jabatan Perdana Menteri (Tugas-Tugas Khas), Datuk Dr Abdul Latiff Ahmad dan Menteri di Jabatan Perdana Menteri (Hal Ehwal agama), Senator Idris Ahmad

Hadir sama, Ketua Setiausaha Negara (KSN), Tan Sri Mohd Zuki Ali.

Ismail Sabri berkata, gerak kerja JPM perlu menunjukkan contoh dan prestasi yang terbaik kepada kementerian dan rakyat dengan melaksanakan semua yang dirancang dengan sebaik-baiknya.

Sebab itu, katanya ada banyak jawatankuasa ditubuhkan bagi memantau dasar kerajaan seperti Jawatankuasa Pemantau Bajet 2022 dan Jawatankuasa Pemantau RMKe-12.

"Kita mewujudkan unit kemiskinan di bawah JPM yang mana Tok Pa (Datuk Seri Mustapa Mohamed) menjadi Pengerusi Jawatankuasa Kerja dan saya sendiri mempengerusikan unit itu," katanya.

Sementara itu, warga JPM diminta lebih giat dan agresif mempromosikan konsep Keluarga Malaysia selaras tanggungjawab jabatan itu dalam hal ehwal berkaitan perkara berkenaan.

Katanya, JPM seharusnya lebih terkehadapan dalam promosi konsep Keluarga Malaysia berbanding jabatan lain.

"Bagaimana kita nak minta kementerian lain sokong konsep Keluarga Malaysia sedangkan kita sebagai 'tuan rumah' tidak melakukan sebaiknya, saya meminta tuan-tuan membantu mempromosikan Keluarga Malaysia dengan lebih giat dan agresif," katanya.